

le dépensé, le recteur luy donnera tout conté et rabbatu dix escus par dessus. Et pour ce qu'il dit du bagage, qu'il cherche toutes les pièces qu'il suppose auoir esté retenues, ie luy promets que toutes luy seront rendues, et un teston de surcroist dessus chasque pièce. C'est vn beau party, nommément a vn misérable tel que doit estre ce criminateur : car vn homme d'honneur et de moyen n'aura iamais mis la main à la plume pour publier ces si puantes bourdes, et tacher à plaisir la renommée de ceux desquels il n'a iamais receu desplaisir. Qu'est-ce donc qui peut auoir poussé cest homme de néant à ce faire? ie n'en veux point coniecturer ou sauoir autre cause, que sa malignité propre, accompagnée d'vn mauvais naturel, formé pour médire, et disposé à mal faire : ou bien ie l'attribueray à son éducation, car estant du nombre de ceux que le schisme a séparé de l'Eglise catholique, apostolique et romaine, l'on voit par expérience que telles gens haïssent à mort les Iesuites, voire auant que iamais ils les ayent veuz. Peut-être aussi sera-ce parce que, selon les lois de la discipline réformée, il est inhibé de transformer les liures de la Bible en tragedie, et il luy fait mal que dans Lyon telles ordonnauces ne sont point gardées. En effect, il semble que sur ceste enclume, ce cyclope aye principalement martelé son carreau de foudre et de calomnie : car il tient à si grand crime qu'on aye representé le Iugement, le Paradis et l'Enfer, que par ce, l'air en aye deu estre troublé, et en soyent arriuez les esclandres pour luy cy deuant mentionnez, et menteusement controuuez. Quoy faisant, il nous monstre de quel esprit luy et les siens sont portez. Car pourquoy ceste hayne nouvelle, et si grande auersion des représentations des choses saintes, sinon pour reuendiquer le theatre à Bacchus et à Venus, ou du moins à celle payenne folie, a qui la gentilité l'auoit dédiée? Et que faisoit Esaye allant tout nud par la ville? Quoy Ieremie portant des chaisnes au col? Quoy Ezechiel s'équipant en mode de soldat formant vn siege de ville, et contre-faisant l'assiegeant et l'assiege? N'es-